

Aen Hawyw Duenngux Bouxcuengh Cingsih

□ Daegngingh cingjeix



▲ Angq roq gyongluengz Bouxcuengh hai haw hung.

◀ Roq gyongluengz hai haw.



▲ Vunz Yeznanz hix daeuj ganj haw.



▲ Aen yizsi baiq ywvuengz.



▲ Foux saeceij aeu fuk.

Cingsih aen hawyw duenngux Bouxcuengh dwg aen hawyw cojcienz ndeu, moix bi seizhah youz vunz dangdieg gag doxcomz baenz haw, hix dwg ngoenzciet hungmbwk vunz lai camgya cienz vwnzva yw Bouxcuengh, fuengz bingh hawj ndang ndei, dwg doenghgij sibgvenq gag baenz miz geij bak bi nanz lo.

Hawyw duenngux dwg doenghgij sibgvenq yw minzcuz daegsaek Cingsih gag miz, aen hozdung neix youq Ciuhdangz Ciuhsung hainduj, youq Ciuhmingz Ciuhcingsih hwnghoeng.

Aen hawyw neix moix bi liggaeuq ngux nyied cosam baedauq

baenz haw, ngux nyied co' ngux ceiq hoengh, caemhcai baenz haw daengz cocaet, cobet. Youq duenh duenngux, doenghboux ndaem yw gai yw, doenghboux canghyw Bouxcuengh daj gak mbanj gyawj Cingsih daeuj, doenghboux canghyw ndawbiengz caeuq vunz lai daj Dwzbauj, Nazboh, Denzdungh, Denzyangz, Yougyangh Gih, Denhdwngj, Dasinh vanzlij Yinznanz Swngj, rogguek Yeznanz daengj daeuj haenx baenz bang baenz gyoengq, aeu ci rag mbaq gwed, dawz gak cungj ywdoj daeuj daengz yienhsingz Cingsih gai. Mizseiz doenghgij dan gai yw miz daengz 4000 lai aen, gak cungj yw

miz daengz 1000 lai cungj, vunz ganj haw miz daengz 2 fanh lai vunz. Baenzneix aen hawyw neix baenz le ciengz hozdung baijok nem gaicawx ywdoj ceiq hungmbwk haenx, hix baenz gizdieg hung hawj vunz ndawbiengz doxgyau gingniemh gvendaengz dajndaem yw, gaicawx yw, ywbingh daengj.

Ciuq cam rox, mwh duenngux ywdoj go hung mbaw laux, yw rengz haenq, yw bingh lai ndei; vunz cienz naeuz ngoenzneix byaij gvaq ndaw haw suphaeuj heiq lai cungj ywdoj le couh ndaej fuengz bingh. Hawyw youq banringz ceiq hwnghoeng, vunz miz baenz geij fanh bae. Youq gwnz hawciengz, mboujdan miz gaicawx, vanzlij miz vunz doxgyau gingniemh yw Bouxcuengh, cienz cihsiz yw Bouxcuengh, doxvuenh ceh ywdoj, doxgangj baenzlawz ndaem goyw ganq goyw. Cawz le miz hawyw cojcienz, youq mboengq ciet hawyw, dangdieg lij banh hozdung yienj haujlai cezmuiz miz daegsaek Bouxcuengh noengzna, nauhyied dangqmaz.

Cingsih aen hawyw duenngux Bouxcuengh dwg cungj siengqingj iq ndeu ndaej yawjraen doenghgij sibgvenq cojcienz gvendaengz vunz Bouxcuengh dangdieg dajndaem guh seng' ei, hix dwg cungj vwnzva yw Bouxcuengh cojcienz seizneix lij miz haenx.

Bi 2007, Cingsih aen hawyw duenngux Bouxcuengh gingvauq Gvangjsih Bouxcuengh Swcigih Yinzminz Cwngfuj doengzeiq, ndaej senj haeuj daih' it buek swcigih gaep feihvuzciz vwnzva yizcanj mingzloeg.



▲ Ywdoj sau.



▲ Gok hawyw ndeu.



▲ Hawyw nauhyied dangqmaz.



▲ Boux canghyw Bouxcuengh yienhciegz yawj bingh ywbingh.